

大方廣佛華嚴經卷第二十四

羌四

唐罽賓國三藏般若奉詔譯

入不思議解脫境界普賢行願品

時此會中有長者女名寶光明與六十童女

眷屬圍遶端正殊妙人所喜見皮膚金色目

髮紺青勝妙圓滿色相具足身出妙香口演

梵音上妙寶衣以爲嚴飾常懷慚愧正念不

亂有大智慧動止安詳具足威儀恭敬師長

最勝清淨心無放逸常念順行甚深妙行所

聞之法憶持不忘宿世善根流潤其心相似

妙果靡不成就清淨廣大猶如虛空等安衆

生常見諸佛盡無餘界求一切智去王不遠

合掌頂禮以恭敬心作如是念我得善利我

得善利我今得見大善知識最難見者於今

得見時女於王生大師想生於最勝善知識

想具慈悲想能攝受想其心正直最勝清淨

生於廣大歡喜之心即解自身所佩瓔珞持

奉彼王作是願言今此大王能爲一切無量

無邊無主無依無明衆生成就救護利益照

明作所依處願我未來亦復如是如彼大王

所知之法所載之乘所修之道所具色相所

攝衆會無邊無盡難勝難壞願我未來悉得

成就隨彼大王所生之處願我常得隨彼受

生爾時大王知此童女發如是心作如是願

觀其意樂而告之言童女當知隨汝所欲我

皆與汝我今所有一切皆捨令諸衆生普得

滿足一切平等心無分別隨汝所願恣意取

之時寶光明女信心清淨生大歡喜速疾增

長一切善根即以妙偈而讚王言

昔此娑羅大城邑 威德聖王未出時

凡諸事物悉無堪	可畏猶如餓鬼處
一切衆生相殺害	竊盜姪洩性難調
虛誑不實麤惡言	雜穢乖離無義語
常樂貪奪他財物	恒懷瞋恚毒害心
依邪惡見不善行	從此命終墮惡道
此諸非法衆生類	愚癡黑闇之所迷
壞滅正法邪見興	由是天龍不降澤
多歷年歲無時雨	百穀芽莖皆不生
樹木藥草悉焦枯	大小泉流亦乾竭
大王昔日未出時	河池及井皆枯涸
一切園苑盡荒蕪	白骨縱橫猶曠野
今得大王居寶位	惠及一切諸羣生
油雲膏雨被八方	大地率土皆充滿
大王出興爲世主	止諸盜賊息奸欺
所有牢獄悉皆空	一切勞獨無憂怖

昔時世界衆生類	好相殺害起怨讎
飲啗血肉恣無厭	今悉慈心互相視
昔時國內諸衆生	貧窮裸露無衣服
飲渴衰羸如餓鬼	以草蔽身受寒苦
大王今既興於世	稻粱甘果自然生
劫波樹藏出妙衣	一切男女皆嚴飾
昔日多求縱非法	爲競微利相陵奪
今時嚴具悉豐盈	自在歡樂如天處
昔縱迷心造諸惡	放逸非分生貪染
於他妻妾起邪姪	乃至種種相侵奪
今時所見他女人	色貌端妍妙嚴飾
心恒清淨無染著	知足猶如兜率天
昔時世界諸衆生	妄言麤惡多離間
恒起邪思滅正法	諂曲雜穢隨人意
今時一切羣生類	悉皆捨離麤惡言

音聲柔軟悅人心	一切聽聞無不喜
大王今演妙法音	衆生聞者咸忻悅
迦陵頻伽梵聲相	諸天音樂無能及
大王頂上殊勝蓋	一切妙寶所莊嚴
瑠璃藏寶吉祥等	覆以衆妙摩尼網
金鈴自然出妙聲	其音超世無倫匹
宣揚一切諸佛法	除滅一切衆生惑
又此鈴音廣宣說	現在十方諸刹土
所有劫海一切佛	具大名稱諸眷屬
又復鈴音次第演	過去一切十方刹
其中諸佛及刹名	所轉法輪無不盡
鈴中又出法輪音	其聲普徧閻浮界
廣說梵釋及衆生	所依諸業皆差別
人天聞此音聲已	各各自知諸業藏
離惡向善勤修行	安住諸佛菩提道

王父號曰淨光明	王母名爲蓮華光
當於五濁興盛時	出現爲王治天下
是時有一廣大園	園有五百蓮華池
一一百千樹圍遶	摩尼華燈所彌覆
於其一池岸上	建立千柱莊嚴殿
以衆雜寶爲欄楯	半月焰光恒普照
彼王末世惡法生	積年亢旱無時雨
一切池水悉乾竭	所有草樹皆枯槁
大王將生七日前	先現禎祥希有相
衆生瞻仰相謂言	救護世者今當現
爾時世界於中夜	大地一切咸震動
其中有一寶華池	出大光明猶日現
五百蓮池所圍遶	八功德水咸充滿
流演普及閻浮地	隨其所至皆霑洽
一切華林及藥草	百穀芽莖苗稼等

所有枝葉及果實	如是一切皆繁盛
種種溝坑及埳阜	乃至一切高下處
如是所有閻浮地	今時莫不皆平坦
一切荆棘及沙礫	閻浮所有諸雜穢
如是皆於一念中	變成衆寶莊嚴地
衆生是時既見已	歡喜相慶而稱讚
咸言我今得善利	如渴乏人思美水
時彼地主光明王	即命輔臣并眷屬
前後導從千俱胝	法駕遊觀諸園苑
是時五百諸池內	有一蓮池名慶喜
於池岸上有法堂	王及夫人於此住
時光明王語夫人	我念曾於七夜前
中宵山地皆震動	此池中有光明現
即時慶喜香池內	忽生千葉寶蓮華
光明上徹須彌頂	雲網照耀如千日

羌四

五

金剛妙寶以為莖	閻浮檀金以為臺
淨摩尼寶為華葉	妙香光藏作鬚藥
大王生彼蓮華上	端然不動跏趺坐
光明相好以莊嚴	百千天衆咸恭敬
光王爾時大歡喜	遽入華池自撫鞠
兩手持以授夫人	此是汝子應欣慶
百千伏藏皆涌出	一切寶樹生妙衣
諸天競奏微妙音	充滿一切虛空界
閻浮所有諸衆生	悉皆歸向生歡喜
合掌咸稱如是言	善哉救世今當出
王時身放大光明	普照一切諸羣品
一念能令四天下	身病黑暗皆除滅
夜叉羅刹毗舍闍	一切毒蟲諸惡獸
所欲惱害衆生者	靡不隱蔽自藏匿
衰毀饑苦諸無利	種種災難病所持

如是衆苦悉消除 世間安樂咸歡喜
凡是一切衆生類 互相瞻視如父母
離諸怨害起慈心 專意勤修一切智
大王關閉諸惡趣 開導一切人天路
利益一切苦衆生 顯示宣揚一切智
我等今得見大王 普獲一切諸善利
無主無歸無導師 一切如應悉安樂
爾時寶光明童女以此妙偈讚歎一切法圓
滿寶蓋大師子吼妙音聲王已遶無量帀合
掌頂禮曲躬恭敬却住一面時彼大王普徧
觀察告童女言善哉童女汝能信知他人功
德甚爲希有何以故一切衆生覆藏已過揚
人之短稱已有德蔽他善根不能信知他人
功德童女當知一切衆生爲諸愚癡黑暗覆
蓋煩惱纏縛不識慚愧不知報恩無有智慧

光四

六

其心濁亂性不明了本無志力又退修行如
是之人不信不解不能了知菩薩如來所有
功德不能分別佛法僧寶最勝福田不知一
切諸佛菩薩清淨法門清淨智慧神通智慧
隨順思惟童女汝今決定求趣無上正等菩
提能知菩薩如是廣大甚深功德能信能解
汝今生此閻浮提中發勇猛心修菩薩行普
攝衆生功不唐捐如汝所願悉當成就如是
功德如是福力如是饒益無不具足王讚女
已以無價寶火光摩尼種種妙色所莊嚴衣
手自投與寶光童女并其眷屬一一告言汝
諸童女各各受取著此妙衣時諸童女雙膝
著地兩手承捧置於頂上然後而著既著衣
已右遶於王頭面作禮時彼一切諸寶衣中
普出一切星宿光明衆人見之咸作是言此

諸女等皆悉端正如淨夜天星宿莊嚴爾時
 夜神告善財言善男子於意云何爾時一切
 法圓滿寶蓋大師子吼妙音聲王者豈異人
 乎毗盧遮那如來應正等覺是也光明王者
 淨飯王是蓮華光夫人者摩耶夫人是寶光
 明童女者即我身是其王爾時以四攝法所
 攝衆生即此佛會大道場中一切菩薩雲集
 者是皆於阿耨多羅三藐三菩提得不退轉
 或住菩薩初極喜地或離垢地或發光地或
 焰慧地或難勝地或現前地或遠行地或不
 動地或善慧地或法雲地各各具足種種大
 願集種種助道修種種妙行備種種莊嚴獲
 種種清淨得種種神通遊種種自在住種種
 解脫從種種方所來此會中處於種種妙法
 宮殿爾時能開敷一切樹華安樂主夜神爲

善財童子欲明此解脫門義而說偈言
 佛子我有廣大眼 普能觀察於十方
 種種廣大刹海中 衆生五趣輪迴者
 亦見彼刹一切佛 皆坐寂滅菩提樹
 神通充徧於十方 說法調伏諸羣品
 佛子我有淨妙耳 普聞一切無盡聲
 亦聞諸佛轉法輪 皆能信受生歡喜
 佛子我有他心智 出過衆生心境界
 無二無礙量無邊 一念悉了諸心海
 佛子我有宿命智 能知過去諸劫海
 自身他身所受生 一念分明皆悉了
 佛子我於一念知 一切刹海極微劫
 佛及菩薩諸神通 五道輪轉衆生類
 我亦知彼諸世尊 初發廣大菩提願
 一切行海具修行 乃至當成一切智

亦知彼佛灌頂地 具足無等菩提道
方便說法悉不空 我於一念皆明了
亦知彼佛方便門 轉大法輪滿世間
涅槃無量諸功德 法住久近皆能了
亦知彼佛所調伏 廣大教法諸乘海
顯示一切諸世間 先四 種種差別皆明了
我於無量無邊劫 修此喜光解脫門
今為汝說真實義 汝應愛樂勤修學
善男子我唯知此菩薩出生廣大歡喜調伏
衆生藏普光明解脫門如諸菩薩摩訶薩親
近供養一切如來入一切智廣大願海圓滿
一切如來願海得勇猛智於一菩薩地普入
一切菩薩地海得清淨願於一菩薩行普入
一切菩薩行海得自在於一菩薩解脫門
普入一切菩薩解脫門海尊重恭敬諸善知

識增長善根常無厭足承事一切諸佛菩薩
勤求一切種智法門愛樂觀察正念思惟其
心決定恒無懈怠不著一切利養恭敬讚歎
名聞於世資生求離貪著滿衆生心如如意
寶心常愛樂一切智地觀察如來力無所畏
佛不共法勤求圓滿一切菩薩波羅蜜行遠
離詭幻如說而行常真實語守護佛種於一
切智其心不動如大山王而我云何能知能
說彼功德行善男子此菩提場如來會中有
一夜神名守護一切衆生大願精進力光明 九
汝詣彼問菩薩云何教化衆生令其發趣阿
耨多羅三藐三菩提云何嚴淨一切佛刹云
何承事一切如來云何能令一切如來皆悉
歡喜云何能於一切菩薩所問學佛法勤求
修習時善財童子禮夜神足遶無數而殷勤

瞻仰深心戀慕辭退而去爾時善財童子往
詣守護一切衆生大願精進力光明主夜神
所見彼夜神在大衆中坐普照現一切衆生
宮殿影像摩尼王藏師子之座普現法界差
別影像摩尼寶網彌覆其上現一切日月星
宿影像身現隨衆生心普令得見身現等諸
衆生差別形像身現無邊廣大色相海身現
普現一切諸相威儀身現普於十方悉能應
現身現普能成熟一切衆生身現廣運速疾
神通法雲身現利益衆生相續徧滿身現常
遊虛空利益廣大身現一切佛所恭敬頂禮
身現增長一切衆生善根身現受持佛法恒
不忘失身現圓滿菩薩廣大誓願身現普光
照耀充滿十方身現法燈普照除滅世闇身
現了法如幻無垢深智身現遠離一切塵暗

法性身現出生佛法覺悟一切身現普智光
照差別身現究竟無患無煩惱身現不可沮
壞具足堅固身現無所依住如來威力身現
性無分別體離垢染身現性本清淨顯照諸
法身時善財童子見彼夜神現如是等佛刹
極微塵數差別身已一心頂禮舉體投地良
久乃起合掌瞻仰於善知識生十種心何等
爲十所謂於善知識生同已心令我精勤辦
一切智助道法故於善知識生白業果心令
我親近發起清淨勝善根故於善知識生莊
嚴菩薩行心令我速能莊嚴一切菩薩行故
於善知識生成就一切佛法心引導於我隨
順修行諸佛道故於善知識能生最勝心令
我生於佛境界中智光照故於善知識生出
離心令我修行普賢菩薩出離行故於善知

識生能具足福智海心令我積集成就福智
白淨法故於善知識生增長心令我精進速
疾增長一切智故於善知識生能具足諸善
根心令我志願悉得圓滿令諸衆生生歡喜
故於善知識生能成辦大利益心令我自在
利樂衆生安住一切菩薩法故成就一切種
智道故發是心已得彼夜神與諸菩薩佛刹
極微塵數同行所謂同念心常憶念十方三
世一切佛故同慧分別決了一切法海差別
門故同趣善巧開示一切如來妙法輪故同
覺以等空智覺悟一切三世教故同根成就
菩薩淨智光明普照衆生諸根海故同心善
能修習無礙功德莊嚴一切菩薩道故同境
智光普照一切如來所行境故同教獲一切
智照諸教海一切相故同義能以智慧覺悟

先四

十一

一切法自性故同法住深入一切法界海故
同勇猛得不共法摧滅一切障礙山故同色
身隨衆生心示現種種相好身故同諸力勤
求成就一切智力不退轉故同無畏其心清
淨猶如虛空無障礙故同精進於無量劫行
菩薩行無懈倦故同辨才得一切法無障礙
智普光明故同無等身相清淨一切世間無
能勝故同愛語凡所語言令諸衆生皆歡喜
故同妙音能師子吼普演一切法門海故同
滿音以圓滿音令諸衆生隨類解故同淨德
隨順修習一切如來淨功德故同淨業成就
清淨一切菩薩諸善業故同智地受一切佛
所轉法輪爲衆生故同梵行安住一切如來
所行智境界故同大慈念念普覆一切國土
衆生海故同大悲興大法雲普降法雨潤澤

一切諸衆生故同身業以方便行教化成就
諸衆生故同語業以隨類音演說一切諸法
門故同意業普攝衆生置一切智境界中故
同莊嚴清淨莊嚴一切十方諸佛刹故同親
近見一切佛出興于世皆親近故同勸請一
切佛爲諸衆生轉法輪故同供養常樂供養
承事一切諸如來故同教化調伏成熟一切
世間諸衆生故同光明普能自在照了一切
諸法門故同三昧普知一切十方世界衆生
心故同充徧以自在力徧一切刹修諸行故
同住處住諸菩薩神通海故同眷屬一切菩
薩共止住故同趣入普入世界微細處故同
心慮普知廣大諸佛刹故同往詣隨順往詣
普入一切佛刹海故同方便悉能示現徧滿
一切諸佛刹故同超勝徧於一切諸佛刹中

光四

十二

無與等故同不退普入十方威德平等無障
礙故同破暗得一切佛成菩提智普光明故
同無生忍入一切佛道場衆海無染著故同
普徧承事供養不可說刹諸如來故同智證
隨順了知諸法門海常相續故同修行現前
勤求順行一切諸法門故同希求於清淨法
周徧勤求深樂欲故同清淨集佛功德而以
莊嚴身口意故同妙意於一切法正分別智
能明了故同精進勤求成就一切如來諸善
根故同淨行成就滿足一切菩薩所行行故
同無礙覺悟了知一切諸法皆無相故同善
巧能於如來一切法中智自在故同隨樂隨
諸衆生心之所樂現境界故同方便善巧修
習一切法門所應習故同護念得一切佛自
在威力所護念故同入地得入一切諸佛善

薩所住地故同所住安住一切諸佛菩薩所
證位故同記荊普爲一切諸佛如來授記荊
故同三昧於一念中普入一切三昧海故同
建立於剎那中示現種種諸佛事故同正念
正念隨順一切如來境界門故同修行盡未
來劫勇猛精進勤修一切菩薩行故同淨信
於諸如來無量智慧速疾愛敬極欣樂故同
捨離滅除一切諸障礙故同不退智與諸如
來智慧等故同受生應現成熟諸衆生故同
所住安住如來一切種智方便門故同境界
能於甚深法性境界得自在故同無依永滅
一切諸有染著所依心故同說法已甚深入
種種法門平等智故同勤修於己身內受持
佛法自體威德所護念故同神通開悟衆生
令修一切菩薩行故同無行不動深入一切

羌四

十三

十方諸剎海故同神力一念徧遊十方一切
世界海故同總持已得一切陀羅尼海普照
門故同祕密了知一切修多羅中妙法門故
同甚深解一切法離相清淨如虛空故同光
明放大光明普照十方諸世界故同智光普
照顯示一切衆生心體性故同震動爲諸衆
生現神通力威德自在普震十方諸佛剎故
同不虛一切衆生種種方所見聞憶念皆悉
令其心調伏故同出離普爲滿足一切菩薩
諸大願海成就如來十力智故同欣樂隨衆
生心而爲開示令歡喜故時善財童子普徧
觀察守護一切衆生大願精進力光明主夜
神起彼十種極清淨心獲此佛剎極微塵數
菩薩同行得是行已心轉清淨於善知識發
起無量無邊歡喜徧袒右肩頂禮其足合掌

恭敬一心瞻仰以偈讚曰

我發堅固自在意 志求無上佛菩提

今於聖者知識所 而起自己無異心

我以得見善知識 普集無盡諸白法

滅除一切眾罪垢 成就清淨菩提果

我因得見善知識 先四 普以功德莊嚴心

盡未來劫諸刹中 勤修利益眾生成道

我念聖者善知識 攝受饒益成就我

為攝我故悉顯示 最勝寂靜真實法

關閉險難諸惡趣 開示淨妙人天路

亦示一切諸如來 所成種智無師道

聖者希有無等倫 是佛最勝功德藏

無垢無量如虛空 出一切智清淨樂

聖者福海量如空 我今所見無邊際

念念之中能出生 清淨善根一切智

仁今滿我波羅蜜 增我不可思議福

令我冠佛妙法縉 長我清淨諸功德

我念聖者善知識 令我成滿諸佛智

我今誓願常依止 速疾成就諸白法

我以善友饒益故 一切功德咸具足

歡喜普為諸眾生 教導宣揚一切智

仁今與我為師範 令我修行無上法

我於無數億劫中 無能少報師恩德

爾時善財說偈讚已白言大聖向所顯現不

可思議菩薩境界願為我說此解脫門名為

何等發心已來為幾時耶久如當得阿耨多

羅三藐三菩提夜神告言善男子此解脫門

名普化眾生生善根我以得此解脫門故

悟一切法自性平等入於諸法真實之性證

無依法捨離世間悉知諸法色相差別亦能

了達青黃赤白性皆不實無有差別而恒示現無量無數清淨色身所謂種種色身非一色身無邊色身清淨色身一切莊嚴色身普見色身等一切衆生形相色身普現一切衆生前色身光明普照色身衆所樂見色身見無厭足色身相好清淨色身離一切惡淨光普照色身大力勇猛平等示現色身一切世間甚深難得色身一切世間無能映蔽色身一切衆生稱歎無盡色身念念觀察種種莊嚴色身示現種種諸形像雲色身出現種種形色顯色色身普現無量神力色身普放一切衆妙光明色身一切淨妙莊嚴色身隨順成熟一切衆生色身隨其心樂現前調伏色身隨所應度成就善根色身現無障礙普光明照色身淨無濁穢廣大光明色身可愛端

正增長不壞色身具足莊嚴清淨堅固色身方便開示不思議法微妙光明色身一切無能映奪色身能映奪一切色身無諸暗障色身能破諸闇色身普集一切諸白淨法色身具足勢力大功德海色身從於過去尊重恭敬爲因所生色身如虛空清淨心所起色身最勝廣大超過妙寶色身無斷無盡大功德海色身普徧出現大光明海色身一切世間無依無別平等色身徧滿十方一切世界無礙色身念念出現不可說刹海顯示種種色相海色身增長一切衆生種種歡喜心色身攝取一切衆生海色身能於一一毛孔之中出師子吼說一切佛功德海色身能淨一切衆生心性甚深信解海色身決定解了一切法義無疑網色身心無障礙種種光網普照

耀色身等虛空量淨光明色身能放廣大摩
尼寶王淨光明色身照現無垢法界影像色
身世無能比色身種種妙相差別莊嚴色身
普照十方色身隨時示現應諸衆生常不斷
絕色身出生寂靜調伏一切衆生色身善能
除滅一切煩惱色身一切衆生功德福田色
身能清淨一切教色身一切衆生所見不虛
色身現大智慧勇猛威力色身無障礙普周
徧色身顯示最勝利益世間色身現能普集
大慈海色身普集大福山王色身普光照現
一切世趣影像色身現能清淨大智慧力色
身隨順一切世間正念色身一切寶相光明
色身顯示毗盧遮那藏色身隨順一切衆生
寂靜色身一切智體相現前色身現微笑眼
能令衆生普生淨信色身一切衆寶最勝莊

光四

一七

嚴普光明色身不取不捨一切衆生色身無
決定無執著色身顯示自在威力加持色身
顯示諸法神通變化色身種種如來善根光
照色身徧法界海遠離諸惡色身普現親近
一切如來道場衆會色身現能成就種種妙
色海色身普徧出現善行所流相似妙果色
身隨所應化調伏衆生色身一切世間見無
狀足色身放種種色淨光明色身顯示一切
三世相海色身能放一切焰海光明色身顯
示無量圓滿光明海色身一切妙香光明普
徧超諸世間色身一一毛孔現不可說極微
塵數日輪雲色身廣大無垢月輪雲威德色
身放無量色須彌山王妙華雲光明色身出
生種種妙鬘雲光明色身顯示一切寶蓮華
雲色身出興一切燒香形像雲徧法界色

身念念普散一切末香藏雲現前變化徧滿十方色身現一切如來廣大願雲色身現一切語言普演法海色身現普賢菩薩形像身雲色身念念中現如是等諸色相身充滿十方一切法界令諸衆生或見色身或聞說法或隨順憶念或親近承事或遇神通或覩變化如是種種不可思議自在威力悉隨心樂皆得開悟應時調伏捨不善業善行圓滿善男子當知此由往昔種種大願力故具一切智速疾力故菩薩解脫廣大力故救護衆生

大悲力故安樂衆生大慈力故勤求隨順不退力故一切如來加持力故作如是事善男子我入此解脫了知法性無有差別而能示現無量色身於一身顯現無量諸色相海於一一相普放無量大光明雲一一光明照

先四 十八

現無量諸佛刹土一一刹土現無量佛出興于世一一如來顯現無量大神通力隨諸衆生心行不同開發覺悟宿世善根未種者令種已種者令增長已增長者令成熟於念念中令無量衆生於阿耨多羅三藐三菩提得不退轉安住種種解脫門中

大方廣佛華嚴經卷第二十四

音釋

姪姪夷針切放也放也枯涸涸下各切榮榮徒濫切裸魯果切埴埴也阜阜都回切藥藥相俞切藥藥如累切藥藥如花之藥也